

SUKAN PARA ASEAN

Peluang sertai skuad 'khas' Singa

► ISMAIL ALI

ismail@sph.com.sg

DARIPADA termenung dan tercangkuk tidak melakukan apa-apa, mengapa tidak membantu Singapura memenangi pingat emas dalam acara bola sepak dalam 2015.

Demikian ajakan jurulatih pasukan bola sepak serebral palsy Singapura yang baru memenangi pingat perak Sukan Para Asean di Myanmar baru-baru ini.

Singapura, yang muncul buat pertama kali dalam pertandingan itu, mengalahkan Thailand dan Malaysia sebelum tumpas dalam perlawanan akhir di tangan tuan rumah Myanmar bagi memenangi pingat perak acara tersebut pada 19 Januari lalu.

"Saya ingin mengajak penggemar bola sepak yang mengalami masalah serebral palsy (sejenis penyakit yang menjejaskan saraf) agar tampil bergiat aktif dalam sukan ini.

"Ini satu undangan kepada anda agar tampil mewakili Singapura dalam sukan kegemaran ramai ini dan membantu negara memenangi pingat emas dalam acara ini dalam Sukan Para Asean 2015 yang bakal diadakan di Singapura nanti.

"Kekurangan anda ini tidak bermakna anda tidak boleh bergiat aktif



NAIB JUARA DALAM KEMUNCULAN PERTAMA: Encik Suhaimi Sudar (*baris belakang, empat dari kiri dan berkaca mata hitam*) bersama para pemain skuad serebral palsy dan pegawai Singapura, termasuk jurulatih Encik Mohamed Zainudeen (*baris belakang kiri sekali*), ketika memenangi pingat perak acara bola sepak Sukan Para Asean di Myanmar pada 19 Januari lalu. – Foto SKUAD BOLA SEPAK SEREBRAL PALSY SINGAPURA

bermain bola sepak, apalagi membantu mengharumkan nama negara," kata Encik Mohamed Zainudeen, 44 tahun, seorang jurulatih bola sepak sepenuh masa yang memiliki Lesen Jurulatih Kelas 'A'.

Menurut beliau, pasukan Singapu-

ra kini mempunyai seramai 12 pemain dan tujuh akan dipilih dalam pertandingan tujuh sepasuk itu.

"Jika lebih ramai pemain bola sepak daripada golongan ini tampil, maka saya berpeluang memilih pasukan terbaik yang dapat membantu

negara muncul juara dalam pertandingan-pertandingan yang kami sertai," kata Encik Mohamed, yang turut mengendalikan latihan pasukan bola sepak Sekolah Menengah Hong Kah.

Buat masa ini, menurutnya,

skuad 12 pemain Singapura terdiri daripada pemain dalam lingkungan usia antara 18 dengan 30 tahun dan datang daripada latar belakang berbeza daripada anggota Perkhidmatan Negara hingga kepada pelajar dan mahasiswa.

Salah seorang pemain skuad serebral palsy Singapura yang beraksi di Myanmar ialah Encik Suhaimi Sudar, 25 tahun, yang bermain sebagai bek kiri.

Mahasiswa tahun akhir Universiti Pengurusan Singapura (SMU) dalam bidang ekonomi itu pada mulanya tidak sedar Singapura mempunyai pasukan seperti itu.

"Saya mula sedar adanya pasukan ini sekitar Oktober atau November 2012. Memandangkan ketika itu saya sedang belajar di luar negara di Norway dalam satu program pertukaran pelajar, saya hanya menyertai latihan pertama pada 29 Jun 2013 dan terus mewakili negara.

"Bola sepak adalah kegemaran saya dan inilah peluang saya menceburinya.

"Saya mengalu-alukan penyertaan rakan-rakan senasib saya dalam sukan ini. Yang penting, asal ada minat dan keikhlasan, banyak yang boleh anda capai dengan menyertai pasukan kami," kata anak kedua dalam keluarga tiga beradik itu.

Mereka yang berminat menyertai pasukan serebral palsy Singapura boleh berbuat demikian dengan menghubungi Encik Mohamed di talian 9677-5137 atau e-mel zaicoach@yahoo.com.sg.